



Mimi Karlsen
Inatsisartunut ilaasortaq, Inuit Ataqatigiit

16-05-2017

Sagsnr. 2016 - 13880

Dok. nr. 5316406

Asasara Mimi Karlsen

Nunat Aqqinik Aalajangiisartut pillugit inatsisissatut siunnersuutip (UPA 2017/124)
suliariineqarnerani apeqquqtitivat nunat aqqinik kalaallisuujunngitsunik allanngortiterinerit
ingerlanersut, ingerlanngippatalu Naalakkersuisut qaugu tamakku
suliariineqarsinnaanissaat takorloorneraat apeqquqtitagalugu.

Postboks 1029
3900 Nuuk
Tlf: +299 34 50 00
Fax: +299 32 20 73
Email: iiknn@nanoq.gl
www.nanoq.gl

Nunat Aqqinik Aalajangiisartunut allattaavoq Oqaasileriffik, apeqquqtilu pillugu
Oqaasileriffimmut nunat atserorneqartarneri pillugut paasissutissanik aallerfigisimavara.

Aajunalu nassuaat:

Siullertut oqaatigisariaqarpoq kalaallit nunamik attersueriaasii qallunaallu
attersueriaasii assigiinngilluinnartuummata. Aappaattullu taasariaqarpoq kalaallit nunat
angallavigisatik tummaarisatik ateqartussatallu atorfissaqartitatik atsertarmatigik.
Taamaattumik erseqqissumik oqaatigisariaqarpoq kalaallit nunatarujussuarnik
atsiisernerat nalinginnaasuunngitsoq, sinerilli timalu angallavigisartagartik annermik
ateqartittarmassuk.

Ataatungaani kalaallit naggioeqatitalu nunamik attersueriaasii naatsumik
erseqqissaavagineqarput, nunat aqqinik suliaqarnerup sutigut aallunneqartariaqarneranik
ersersitsissammat.

1. Kalaallit naggioeqatitalu nunamik attersueriaasiat ukiunik tusindilikkaanik
pisoqaassusilitut oqaatigisarialik ataqqisariaqartorlu tassaavoq nunap ilusia malillugu
nunamik atsiisarneq. Nunat aqqi taamatut atserneqarsimasorpassuit ilaannit uku
assersuutitut taasinnaavakka:

- Umianguit umiamut assingunera pillugu taama atserneqarsimasoq,
- Nuussuaq noorujussuunera pillugu,
- Qeqertaq qeqertaanera pillugu taama atserneqarsimasoq allarpassuillu.

2. Siulitta nunamik attersueriaasiat alla taasariaqartoq tassaavortaaq qanoq
pisoqartarsimanera malillugu nunamik atsiisarneq. Assersuutitut nunat aqqi taama
atserneqarsimasut taaneqarsinnaasut tassaapput:

- Nasittarfik puisinniat nasiffigisarsimasaat (Ilimanap timaani Tasiusamiittooq),
- Pituffik ujarak qanga arfanniat arfattaminnut pituffigisarsimasaat (Siorapaluup
avannaaniittooq),

- Qajaa angut panilik utoqqanngorluni qajartornissaminik nangiartalerami ikkarlummit puisinniartarsimanera pillugu Qajaanik atserneqarsimasoq (Ilulissat Kangerluata ilaaniittooq).

Nunat aqqi taakku taaneqartut pisoqarujussuunngillat, taamaakkaluartoq ilisimaneqanngilaq qangarpiaq atserneqarsimanersut.

3. Siulittalu nunamik attersueriaasiat kingullertut taasariaqartoq tassaavoq qanoq pisoqarsimanera malillugu nunamik atsiisarneq, assersuutitut nunat aqqi taama atserneqarsimasut taaneqarsinnaasut tassaapput:

- Anoriluk; ateqaatigalugu umiat anorlersorsuarmi tassunga nunnissimagamik umiaat ajortilluni toqusoqarlutillu (Sarfangannguit kangianni kangerlummi Maligissaniittooq),
- Qajaarserfiup; ateqaatigivaa arnaq nunap timaannarsuani itillilluni qaannani ujarlugu ujarak kaavillugu ujarsimammag. Ujarak kaavitaat taamatut attersimavaat (Niaqornat kangiata timaannarsuaniittooq).

Nunat aqqi assersuutitut taaneqartut pisoqarujussuunngillat, aammali ilisimaneqanngilaq qangarpiaq atserneqarsimanersut.

Qulaani nunamik atseeriaatsit pingasut taaneqartut qangarsuaaniit kalaallinit naggueqatitsinniillu eragineqarlutik tammatsaalineqarsimapput. Ullutsinni siulitta nunat attersimasaat 33.000-nik ikinnerunngitsut nalunaarsugaatigineqarput. Taakkulu Nunat Aqqinik Aalajangiisartut pillugit inatsisartut inatsisaat malillugu Nunat Aqqinik Aalaangiisartunit atuuttussanngortinnejqarsimapput.

Erseqqissaatigisariaqarporlu inatsit taanna malillugu nunat aqqinik atuuttussanngortitsisartut tassatuaammata Nunat Aqqinik Aalajangiisartut. Nunat Aqqinik Aalajangiisartunit aalajangersaavigineqartussaanngitsutut inissinneqarsimasut tassaapput inoqarfinni aqquserngit aqqi inoqannginnersallu, kiisalu nunatta aqqa Kalaallit Nunaat Nunat Aqqinik Aalajangiisartunit atuuttussanngortinnejqartussatut aalajangersagaanngitsut.

Nunat aqqinik pioreersunik kalaallit attersimasaannik katersilluni nalunaarsuineq pisarpoq nunat aqqinik ilisimasallit utoqqaat, piniartut aalisartullu sumiiffimmi ilisimannilluinnartut suleqatigalugit. Taamatut katersinermi nunanik qangarsuaaniit atequareersunik katersineq pisarpoq nunat aqqinik ilisimasallit taakkulu siuliisa nunat aqqinik ilitsersuisimanerat malillugu.

Allamiulli assersuutigalugu qallunaat nunamik attersueriaasiat kalaallit naggueqatittalu attersueriaasiannit allaanerujussuuvooq. Ukiorpssuit ingerlanerini Kalaallit Nunaannut ilisimasassarsioriartortut assigiinngitsunik siunertallit nunatsinni nunamik attersuisarsimapput, sulilu atsigaat amerlasuut pisortatigoortumik atiullutik.

Nunani allamiut Kalaallit Nunaanniittarsimasut nunamillu atsiisarsimasut tassaapput qanga nunatsinnut arfanniariartarsimasut, ilisimasassarsioriartarsimasut qalasersuarmukarniarlutiluuunniit nunatsinnut aqqusaartarsimasut.

Nunami allamiut Kalaallit Nunaanni nunamik atseeriaasii assigiinngitsut ataani takuneqarsinnaapput, maluginiagassallu ilagivaat suli inuusoq atsiuttarmassuk:

- Kalaallit Nunaannut angalanermut aningaasaliisut aningaasaleqataasulluunniit nunap aqqatut atsiussuuttarpaat.
- Kalaallit Nunaannut angalasut ilaqtutatik nunap aqqatut atsiussuuttarpaat,
- Kalaallit Nunaannut angalasut nunani allani tusaamasat aqqi nunap aqqatut atsiussuuttarpaat.
- Kalaallit Nunaannut angalasut nunani allani illoqarfiiq aqqi Kalaallit Nunaanni nunap aqqatut atsiussuuttarpaat.
- Nunani avannarlermeersut nunatsinni angalasut oqaluttuatoqaatiminneersut nunap aqqatut qaqtigoortumik atsiussuuttarpaat.
- Kalaallit Nunaannut angalasut nunap qanoq isikkoqarnera aallaavigalugu qaqtigut atsiisarput.

Allamiut nunatsinni nunat atsersugaat amerlanerpaartaat inoqarfiunngitsumi inissimapput, amerlanerpaartaat Tunup avannaaniillutillu nunatta avannaarsuaniillutik. Assersuutit taaneqarsinnaavoq nunatarujussuaq Jameson Land William Scoresby mit 1822-mi atserneqarsimasoq, kammalaatini oqaluttuarisaanermi Edinburgimi professoriusoq atsiussimagamiuk. Nunat aqqi allamiunit atserneqarsimasut tamangajammik inoqarfiunngitsumiittut allamiut atsigaat Nunat Aqqinik Aalajangiisartunit pisortatigoortumik atuuttussanngortinneqarnikuupput. Taamaattoq pissusissamisoorpoq misissussallugu nunat aqqi allamiut atsigaat kalaallisut ateqarnersut paassisallugu. Taamaattumillu nunat aqqinik 2007-mit 2012-p tungaanut Oqaasileriffiu katersinerani katersugaasa ilagisimavaat nunat aqqi kalaallisut ateqartinneqaraluarlutik pisortatigoortumi allamiusut ateqartinneqartut. Nunat aqqi arlallit taamaattut naammattuukkat pisortatigoortumik Nunat Aqqinik Aalajangiisartunit kalaallisut ateqartinneqalernikuupput.

Erseqqissaatigineqassaaq Nunat Aqqinik Aalajangiisartut aalajangernikuummassuk nunat aqqi kalaallisut ateqartinneqanngitsut allamiusut ateqaannassasut, tassani tunngaviulluni kalaallit atsersueriaasiat ataqqineqarmat eriagisariaqarlunilu.

Inussiarnersumik inuullaqqusilluta
Med venlig hilsen

Doris Jakobsen